

四庫全書

集部

欽定四庫全書

宋詩紀事卷四十二

錢塘厲鶚撰

陳序

序字彥育句容人從蘇庠學詩受知于浙漕句  
伯恭邀與同行妻以愛姬姬寇萊公元孫也伯  
恭聞于朝授和州文學終刪定官有碧巖集

遊鍾山題八功德水菴壁

寒騎瘦馬度山腰目斷清溪第一橋盡是帝王陵墓處

野風荒草暝蕭蕭

十年塵土暗衣巾  
亂走江鄉一病身  
西第將軍成底事

北朝開府是何人

清波雜志

方千里

千里官舒州簽判

題真源宮

萬歲丹霞府千函  
藥笈書時時膽絳  
節往往下雲車近

與剛風接高連上  
帝居登前望南岳  
清蹕滿空虛

宋藝圃集

錢惟岳

曹娥碑

曹娥廟貌樹豐碑千古行人誦色絲苦恨當年題八字

不旌賢孝只旌辭

方輿勝覽

胡致隆

致隆字藏之臨江人自號蕭灘居士父彥明與山谷進士同年故藏之以詩取知于山谷無子

遺橐不傳

題吳生畫桃源圖

王宰十日畫一石左思十年賦三都誰似今時吳道子  
咄嗟能辦武陵圖武陵不與人間隔可憐舊日無尋覓  
蒼蒼烟水只依然試倩漁舟問消息

聲畫集

題瘞鶴銘

當年誰為裹玄黃潮打孤城草木荒華表竟無新信息  
斷碑空有碎文章雲埋紫蓋峯何在烟鎖青田路正長  
遙想華亭披道氅夜隨明月過錢唐

蘆浦筆記

星子樓

葛巾藤杖竹籬籬靜夜江樓縱目初海獸擎山出彭蠡  
玉龍銜水下匡廬三更雲盡猿啼露十里月寒人捕魚  
已問湖山借主角他年來此老樵漁

方輿勝覽

山谷坐上分題賦竊

平生冰雪姿七星羅心胃豈無有絲毫上裨天子聰而  
不自見達胡為乎泥中沈疴正無賴安得君從容其子  
亦可憐風味如乃翁

合璧事類別集

喜曹劉二從事見過

蕭蕭細雨鎖柴門  
喜見風流二使君  
俊逸萬春猶錄事  
清新子建尚參軍  
飄零世路詩千首  
寥落江湖酒一尊  
多病揚雄謝來往  
暮年誰更可論文

詩林萬選

羅從彥

從彥字仲素南劍州羅源人從龜山遊以累舉  
恩授惠州博羅縣主簿紹興初卒學者稱豫章  
先生淳祐閒謚文質有集

題一鉢菴

可憐萱草信無憂  
誰謂幽蘭解結愁  
欲得寸田荆棘斷  
祇應長伴赤松遊

豫章集

熊蕃

蕃字叔茂建陽人宗王安石之學長于吟詠嘗  
作茶錄

登金山

注海銀成壑浮空玉作堆  
鼇翻三島出鷺駕一峯來  
塔



影波搖動鐘聲潮拍回猶嗟禪伯老虛入妙高臺

金山志畧

何 麒

麒張丞相商英外孫

外大父丞相初登科為雒縣主簿經攝珣窰鎮稅  
官留詩護國寺中令狐監征錄以見寄謹再拜追  
和而記其後

傳翁遺墨賸咨嗟四海當年尚一家大老不為今日用  
小詩徒遣後人誇興來思跨巴滇馬歸去方乘下澤車

燕麥兔葵僧舍裏何如夢得訪桃花

成都文類

### 虎丘

平地涌巖壑  
樓層驚大雄  
何曾遠人世  
真欲倚天宮  
白虎威靈在  
赤烏緣影空  
生公能說法  
音與塔鈴同

吳都志

### 龍多山

世路聳牙赤水過  
故升天險問龍多  
書中舊識唐公昉  
圖裏又聞馮益羅

方輿勝覽在合州赤水縣北按唐孫職方樵龍多山錄有至道觀東有大池即唐武后時放生

池中峯有唐驚臺院東有佛慧院有萬竹竹徑  
園尺有東巖廣五十丈多唐人刻字又有靈山  
院泉自巖出瀦為方池大旱不竭其山高明窈  
深變態萬狀有駕鶴軒下視涪水如帶烟雲出  
沒山之偉觀也圖經云廣漢人馮益羅煉丹于  
此晉永嘉三年舉家十七人仙去何顒詩云云

董瞿老

黃彥與從無逸求妻埋銘以硯謝之無逸邀予作

歌

君不見昌黎翁南遷益覺文章工滑稽戲作毛穎傳陶  
泓之族稱弘農又不見東坡翁生涯寄食破硯中詆訶

龍尾尊鳳咮更誇丹石蒸赤紅古來文士耽翰墨十有  
八九坐此窮怪君落筆妙言語四壁才堪蔽風雨幾年  
結柳送奴星文窮跳梁推不去硯能窮人君不鄙爾來  
諛墓得龍尾綬巾什襲不妄觀碑字三縑何足擬玉堂  
視草乃稱之只恐玄文似揚子君誇此硯文似羅奈君  
鹿裘帶索何我雖忍窮亦好事尚能搜句為君歌嗚呼  
魯公乞米家食粥不費銀鉤寫珠玉

前賢小集拾遺

杜東之

雲安王虛觀南軒感事偶書

古觀久荒涼寂然外人境草木既榛蕪風雨亦頽隕我  
來一冀除地淨窗為回晨光散桐陰夕照落栢影置以  
六尺牀度此三伏永終朝饜清涼半夜或淒冷客至共  
浮瓜睡餘獨煮茗遙聞斗甯兒爭奪沸蛙黽街頭米十  
千旱井費縻綆對我脫粟盤徐餐休祝鯁

穉梧值歲首擢起青琅玕其葉大如掌其陰勻若攤弱  
幹尋丈展氣已雲霄千期之四五載定足容棲鸞我老

無定居僦屋蝸螺跼平生輞川宅面勢胸中盤何當遂  
誅茅規庭十步寬非無松栢堅未易蒼龍搏種此南窗  
下醉眠風雨寒

至自雲安題淨戒院

山口出雲鳩喚雨三月巴山蒸溽暑濁流來作虎眼文  
一葉孤舟命如縷道傍綠樹清陰涼中有金仙古道場  
去家纔餘二百里且復看此青竇當出門滿目傷羈旅  
歸舍還煎碎兒女欲問閨黎借榻眠臥對龕燈淡無語

麥芒焦桑椹紫田家夫婦忙欲死蠶入簇麥登場夫婦  
飽煖孰可當道傍書生空有婦不蠶而衣真汝負功名  
富貴老不來書劒風塵一生誤何時即買百株桑身耕  
婦織策最良董生莫厭徵租吏蘇子無由黑貂敝

雲安下巖

濤江翻雪卷湖灘晚泊巖扉暫解顏夙有淨緣逢寺喜  
老無生理伴僧閒殘雲已斷獨飛雨落日將沈卻照山  
半夜秋聲驚客夢一簾珠貝冷珊珊

以上全蜀藝文志

李 祁

祁字蕭遠尚書郎謫監漢陽酒稅

郎官湖春日

兩山收雨暗平沙  
遮斷溪梅隔水花  
留得烟林作圖畫  
依稀松磴有人家

空山玉蘂照瓊瑰  
到處尋花共往回  
欲識春風最奇處  
試來同看雨中梅

朦朧花影月黃昏  
著意春風入酒痕  
知是江梅喜佳客



倒垂花藥照清樽

十日春陰到水亭水邊楊柳一時青  
梅花過盡桃花惡

乞取山礬入淨瓶

能改齋漫錄

張師中

楓橋寺

吳門多精藍此寺名尤古距城七里餘冠蓋日亭午  
古逕通采香遠岫對棲虎巖扉橫野橋塔影落前浦  
霜樓鳴曉鐘夕舸軋雙槽方丈中有人學佛洞禪語  
跡忙心

已閒道樂行彌苦不為喧所遷意以靜為主何必深山

林峯巒繞軒戶

吳郡志

徐忻

西清詩話徐忻作詩有唐人風氣嘗和雪詩云  
著衣輕有暈入水淡無痕

劍池

劍去池空一水寒遊人到此凭闌千年來是事消磨盡

只有青山好靜看

西清詩話

周李

李字德紹海陵人燁之季父

悅川碾茶

獨抱遺經舌本乾笑呼赤腳碾龍團但知兩腋清風起

未識捧甌春筍寒

清波雜志

晁載之

載之字伯宇仕封丘丞有封丘集

晁公武郡齋讀書志世父封丘府君黃魯直薦于蘇子瞻云晁伯宇謹厚守文從遊多長者願一語教戒之子瞻答云晁伯宇詩騷細看甚奇麗信乎其家多異材也

感時事作

森森月裏栽丹桂歷歷天邊種白榆雖未乘槎上霄漢  
會須沈網取珊瑚

曲洧舊聞政和以後范石綱浸感晁伯宇有詩  
人多傳誦

昭靈夫人祠

殺翁分我一杯羹龍種由來事杳冥安用生兒作劉季  
暮年無骨葬昭靈

能改齋漫錄

劉旦

旦敞之孫樞密奉世之子

句

膺門昔忝登龍客董墓今悲下馬人

能改齋漫錄劉仲馮樞密之子旦能詩傳康伯嘗薦之旦後過公墓賦詩人多稱傳

祖德恭

德恭字肅之無擇弟提刑無頗之子宣政間待

普州太守闕寓居安陸

致政張安卿承事挽詩

重歎張夫子神襟遽弗寧摧山傾嶽算姜哲奄椿齡舊  
室惟圖像新阡但刻銘何堪聽歌挽埋玉在幽垆

祖龍

學集附

翟望

望汴京人大父光圖為安定靖王教授望年二  
十喜讀騷經寓詞蘅杜閒每水邊沙外屬思幽  
放人莫測其意

寄言

洞簫吹兮春烟綠  
風光粲兮人如玉  
搴木蘭兮溯流波  
懷彼美兮憂心若何

曹勛松隱文集

李 愬

愬字去言公  
擇尚書猶子

春晚

花瘦烟羸可奈何  
不關渠事鳥聲和  
無人掃地驚原闕

分付輕紅上碧莎

墨莊漫錄

句

去國春城桃李花  
楓林葉病尚天涯  
今年九日風前帽  
北客扁舟雨後沙  
蒼黃避地小兒女  
漂泊連牀老弟

兄  
紫微詩話

晁貫之

貫之字季一

曰琯按朱弁風月堂詩話稱爲晁季一檢討又云晁察院季一益其

歷官也

春渚紀聞晁季一生無他嗜獨見墨丸喜動眉  
宇其所製銘曰晁季一寄寂堂造者不減潘陳

句



草堂不見杜陵老折得青松度水歸

訪杜師與不遇  
紫微詩話

晁謙之

謙之字恭道居信州紹興閒以數文閣直學士

知建康

南巖

南巖夫何為山作天倚蓋山南谿山複飛頂壓其外當  
空橫廣頌架屋喉舌內嘗聆釋氏說仰覆各世界千閒  
未可著五畝良不隘清冷氣射人熱惱從此潰崖奔木

疎瘦谷遠鳥幽怪  
竭予與二子高興偶  
相戒松舟下清江  
毛髮數蝦蟹  
籃輿上峻嶺  
幢節望杉檜  
李侯勲門胄  
文彩山作繪  
趙君儒林孫  
嫖美蘭結佩  
不為城府遊  
繼此日子邁  
寧知老逾拙  
意在精力退  
得居溪南山  
食飲與山對  
夔魑入奧突  
雲雨出紳襜  
顧此誠未逢  
欣然與心會  
彭湖兩岸慶  
泉作一綫  
霈禪月古臺  
空靈境自明  
晦平生所驅  
使詩酒俱好  
在天涯得吾  
侶物外從所  
快便欲登赤  
城一觀天  
字大

廣信府志

章 緯

緯字伯成案之子終戶部郎中權知揚州

句

船尾淮山青未了馬頭隋柳綠相迎

送龔校書紀聞

中興

范季隨

季隨學詩于韓子蒼有陵陽室中語

南源寺

嬾逐兒曹載酒行  
揭來蕭寺作清明  
江湖萬里此身健

風雨一春今日晴露地野花雙戲蜨並湖烟樹獨啼鶯  
挂冠神武何時見只合深藏諱姓名

撫州府志

呂知止

知止本中從叔

絕句

彭澤有琴嘗無絃大令舊物惟青氍我亦四壁對默坐  
中有一牀供晝眠

初涼

西風吹木葉庭戶作涼時夜有愁人歎寒先病骨知上以  
紫微詩話

許彥國

彥國字表民青社人有詩集

周邦彥云寬平優游中極物情惜乎流落不偶  
故世人知之者或寡也

紫駟馬

黃金絡頭玉為釵蜀錦障泥亂雲葉花閒顧影驕不行  
萬里龍駒空汗血露牀秋粟飽不食青芻首常無顏色

君不見東郊瘦馬百戰場天寒日暮烏啄瘡

秋雨歎

曰璐按此詩宋藝圃集作許顗

霖雨不出動隔旬門外秋草長于人江湖浩渺欲無岸  
錦石最小猶生雲微陽片月何曾見只有莓苔昏筆硯  
田家禾穗未暇悲茅屋且為螢火飛

以上宋文鑑

虞美人草行

鴻門玉斗紛如雪十萬降兵夜流血咸陽宮殿三月紅  
霸業已隨煙燼滅剛強必死仁義王陰陵失道非天亡

英雄本學萬人敵何須屑屑悲紅妝三軍敗盡旌旗倒  
玉帳佳人坐中老香魂夜逐劍光飛清血化為原上草  
芳心寂寞寄寒枝舊曲聞來似斂眉哀怨徘徊愁不語  
恰如初聽楚歌時滔滔逝水流今古楚漢興亡兩丘土  
當年遺事總成空慷慨尊前為誰舞

茗溪漁隱叢話冷齋以此詩為曾子宣夫人魏氏作余昔隨侍先君守合肥嘗借得許表民家集集中有此詩又合肥老儒郭全美乃表民席下舊諸生云親見渠作此詩今曾端伯編詩選亦列于表民詩中覽者可以無疑亦知冷齋之妄也

采蓮吟

湖邊日落鴛鴦飛  
羅衣香轉蘭舟移  
蓮根斷處手滿絲  
手滿絲不能理  
秋雲深隔君子

臨高臺

高臺跨崇岡  
簷宇鎖空霧  
新晴洗雙目  
千里在跬步  
霏霏漁浦烟  
冉冉富春樹  
風花不我私  
何以理愁緒  
誰疏白玉窗  
中有浮雲度  
浮雲吹不開  
不見行人去

以上前賢  
小集拾遺

漁父



榮辱從來總不知幾間茅屋對漁磯江鷗散處夜無伴  
荷葉老時秋有衣

後村千家詩

晚宿江漲橋

鳥徑青山外人家苦竹邊江城懸夜鎖魚市散空船岸  
靜涵秋月林昏宿水烟又尋僧榻臥夜冷欲無眠

咸淳

臨安志

葉大年

挽王學正偉

書劒當年遊上都賢關蟲篆校諸儒文華燦燦九苞鳳  
俊氣駿駿千里駒妙質競誰揮堊墁白頭空此死樵蘇  
遺編殘藁應猶在搔首令人益歎吁

遺文膾炙在吾鄉賦罷誰能少薦揚聲迹有妻先夢蜨  
行藏無子付泝方雲羅烟蔓新泉宅秋月春花舊野堂  
交倡彩牋真翰墨幾人知為寶巾箱

中吳記間王偉字康國居太學有聲鄉人謂之  
王學正識與不識皆尊敬之有堂名逸野以累  
試不利日遊適其中讀書自娛其持身治家鄉  
中率以為法生平無子王氏舉族祀之不絕業

大年挽之云云

李遠

遠字器之

僕久客錢唐有吹笛月下者同旅聞之淒然有歸思屬令賦之

柯亭之椽不復得  
蘄州黃竹今尚存  
蒼崖翠壁產修幹  
千頃蕭索烟雲昏  
羌人眼力發天巧  
長笛裁成鳳膺飽  
老龍餘響出空星  
欲噴炎天作秋曉  
西湖夜寂涼風生

山頭一鉤新月明商聲悽悲羽聲壯行子忽忽難為情  
時無綠珠清音激皓齒野王臨風三弄亦已矣惟有愁  
端無古今舉刀不斷東流水深閨蘭燈照空牀笛聲不  
如離恨長曲終人散一惆悵回首江山非故鄉萬事浮  
雲過寥廓且醉杯中琥珀薄君不見玉管橫吹黃鶴樓  
江城五月梅花落

前賢小集拾遺

陳君嚮

絕句

無情今古垂楊岸客舍不禁風絮亂侘年若解拂人頭  
只恐青青顏色換

陶朱新錄君嚮少年在京悅一小鬟作

李若水

若水本名若冰欽宗賜名若水字清卿曲周人  
靖康初以上舍登第由太學博士歷吏部侍郎  
京師陷從欽宗幸金營不屈死之建炎初贈觀  
文殿學士諡忠愍有集

靖康小雅靖康之難死節之士公為第一弔之  
詩曰烈烈李公實備全德義動幽冥氣貫金石  
扈蹕敵營爰定忠烈祀人之憂廢立大厄公捉  
不顧二酋面叱勇甚雷霆天地動色命輕鴻毛  
名高斗極燎原之火不變藍瑩滔天之溺砥柱  
獨立死得其所震耀方冊

奉使太原途中呈王坦翁副使

舊持漢節媿前人消息傳來苦不真五鼓促回千里夢  
一官妨盡百年身關山吐月程程遠詩界含秋句句新  
孤館可能忘客恨脫巾聊進一杯春

三朝北盟會編

衣襟中詩

我馬南來久不歸山河殘破一身微功名誤我等雲過  
歲月驚人和雪飛每事恐貽千古笑此心甘與衆人違  
艱難唯有君親重血淚斑斑染客衣

能改齋漫錄

化成巖

翠石黏雲溼寒巖帶蘚深樹函懷古意水印讀書心經  
濟神猶在幽棲逕可尋青氈吾舊物稅駕臥山陰

江西通志

句

東風無迹秀芳草野鳥不言銜落花  
一庭鳥跡天書

怪八尺簾紋人字寒  
聲聲千里暮雁影一天秋

合璧事類後集

毛寶

寶字文友靖康元年以朝請大夫延康殿學士

知杭州

冷泉亭詩

并序

昔人以為冷泉未極其妙因加小亭然泠然水光涵  
然山翠以故去者過半予以謂不必加工但去其尤  
贅者斯善也如明鏡而加績畫非不美好所以為清



明者逝矣拂拭菑翳舊觀復還

面山取勢俯山中亭外安亭自蔽蒙眼界已通無礙物

胸中陡覺有真空試尋櫓響驚時變

洞中事

卻聽猿啼與

舊同

白援事

萬事須臾成壞裏我來閱世一初終

咸淳臨安志

富直柔

直柔字季申弼之孫以父任補官靖康初賜進士出身高宗朝累除同知樞密院事提舉洞霄

宮

題萬象亭

并序

燕堂後本登覽勝處窘于短垣叢薄中未見識拔觀  
文葉公政成之暇命鑿垣築臺建亭其上遂為一府  
面勢殊特之觀落成有日謹賦拙詩少見欣快之意  
堂後山川面面通向來奇觀窘蒿蓬元戎小試經綸手  
萬象都歸指顧中雨罷卷簾憑爽氣酒酣極目送飛鴻  
明年鳳閣鸞臺上好寄新詩下北風

淳熙三山志

鄧肅

肅字志宏沙縣人欽宗朝召對補承務郎張邦  
昌僭位奔赴南京擢左正言罷歸家居紹興三  
年卒有耕櫛集

花石詩

蔽江載石巧玲瓏雨過嶙峋萬玉峰  
鱸尾相銜貢天子  
坐移蓬島到深宮

浮花浪蘂自朱白月窟鬼方更奇絕  
繽紛萬里來如雲  
上林玉砌酣春色

皇帝之圃浩無涯日月所照同一家北連幽薊南交趾  
東極蟠木西流沙

安得守令體宸衷不復區區踵前蹤但為君王安百姓  
圃中無日不春風

耕欄集

宋史本傳肅少入太學時東南貢花石綱作詩  
十一章言守令搜求擾民用事者見之屏出學  
欽宗嗣位召對便殿補承務郎

### 寄朱韋齋

歸帽納毫真得策要牋留帶計還疎公如買菜苦求益

我已忘腰何用渠閉戶羽衣聊自適推窗柿葉對人書  
帝都聲價君知否寄付新傳折檻朱

陸文裕溪山餘話韋齋觴客拚擱以冠帶寓之  
醉起韋齋曰留以質紙筆明日如約韋齋受筆  
還冠而以紙少留帶曰儻無千幅終不還故拚  
擱為寄此詩前輩風流調笑藹藹如此

曾如驥

如驥泰和人為寶慶通判死金兵之難建炎改  
元贈敷文閣待制謚忠愍

題考功印紙

謹將節義二字結果印紙一宗了卻神遊何處澄江明

月清風

豫章詩話金兵薄寶慶通判泰和曾公如驥遣弟如駿歸曰吾既以身許國不得顧先人宗祀矣汝其圖之涕泣與別復取功印紙題其上云云澄江指泰和故鄉也事亟矣書舍生取義一章于壁以明已志城將陷左右請迎降公叱之登子城投資江死郡人義而斂厝之明年建炎改元太學生上書叙其功

何迂叟

迂叟字次仲黃州人

遊赤壁和答韓子蒼

兒時宗伯寄吾州  
諷誦高文至白頭  
二賦人間真吐鳳  
五年溪上不驚鷗  
蟹嘗見水人猶怒  
鵲有危巢孰敢留  
珍重使君尋故跡  
西風悵望卞城樓

能改齋漫錄東坡謫居于黃五年赤壁巨鵲棲于喬木之上後賦所謂攀栖鵲之危巢俯馮夷之幽宮是已韓子蒼靖康中守黃州三月而罷因遊赤壁而鵲已去作詩示何次仲迂叟次仲和答

王以寧

以寧字周士湘潭人由太學生仕鼎澧帥幕靖  
康初徵天下兵以寧走鼎州乞師解太原圍建  
炎中以宣撫司參謀制置襄鄧有詞一卷

道中聞九里香

即木犀花湖南呼九里香

不見江梅三百日聲斷繁簫愁夢長何許綠帟紅幘客

御風來獻返魂香

墨莊漫錄

句

人情千里白頭浪世事幾番黃葉風

和人叢話

苔溪漁隱



熊彥詩

彥詩字叔雅安仁人靖康中太學博士

三朝北盟會編自帝蒙塵金人館于齋宮日遣  
蕭慶須索城中物校書郎劉才邵傅宿國子監  
主簿葉將博士熊彥詩上官悟等五人押經書  
印板并館中國籍往營中交割

屏山夜雪

和劉彥冲潭溪四景之一

夜深寒妥帖前村人斷絕何許小茅茨開門滿山雪

翰

墨大全

司馬朴

朴字文季溫公之姪孫以外祖范純仁恩補官  
欽宗時為兵部侍郎以奉使見留金人挾以北  
去居于祁陽授以官不可竟握節而死高宗贈  
兵部尚書諡忠潔

無餘居士齋壁有沈傳師遊道林岳麓詩石刻穆  
仲等和之因亦次韻

湘西勝景豈易論羣山騰闖萬里奔鶴泉一麓騫鵬噉  
松風十里藏祇園當時侍御偶題寫筆力孰敢爭榮尊

東京少年妙詞藻南陽舊族齊陰樊天心月脇出奇語  
使我展讀忘朝昏差差戈劒隱一敵落落旗鼓嚴千屯  
無餘居士勵幽志細研六藝方專門凍餒嬌兒慣腸覓  
啼飢瘦婦餘淚痕唯君德義允相愜每窮道妙角與根  
他人勸酒逐驚魂二子頻酌勤空樽醉中詩成渺江海  
風外帆影徒飛翻卷藏篋笥何戢戢風生襟袞何軒軒  
嗟乎我亦有餘腐陋哉羊政囚華元

中州集

句

積雪日出杲雪飛梅已殘朋遊要及時閣鄰有遐觀乘  
此蕪穢平快覽天宇寬霽色混銀界曠望連江千山如  
白毫相滉溢清揚端一氣轉浩渺萬里皆瀰漫優哉賦  
梁苑想像排廣寒

中州集文季工書翰有晉人筆意興陵萬機之暇嘗購其遺墨學之有雪霽同韓公度登圓福寺閣和李效之詩今畧載于此云云此下不可讀當俟善本考之

李 炳

炳號寄菴

弔危翁一

南鄉老人危翁一歲晏雨晴扶杖出驚聞二帝塵再蒙  
歸闔柴門哭三日眼空愁絕聲遂止里人唁翁翁死矣  
凜然生氣申包胥萬古千秋葬忠義

邵武府志危翁一光澤人家貧業樵聞二帝北狩哭三日骨立而死季奇菴以詩弔之

余淳禮

淳禮靖康丙午海康令

題遺直軒

二蘇翰墨仙同謫百蠻裏時有田舍翁結茅住行李邇  
來三十年聞名輒掩耳天定能勝人稍復蒙料理公卿  
尋斷編臺隸藏敝屣敗屋亦見修變故乃如此開軒畫  
遺像凜凜有生氣卻恨封德彝不見盛時死兄弟對牀  
眠此意孤一世騎鯨儻相逢笑人真好事

廣東通志海康城南吳國鑑館蘇子由之所時  
子瞻亦謫儋耳同處月餘靖康丙午令余浮禮  
賈地開軒繪二公像于中且賦詩

## 顏博文

博文字持約德州人靖康初官著作佐郎金人  
立偽楚時充事務官草勸進表南渡初竄澧州

移賀州死

清河書畫筋顏持約晚有鄭度之貶作山水橫  
看頗有清致在五羊賣畫自活竟死瘴鄉

末利花

竹梢脫青錦榕葉隨黃雲嶺頭暑正煩見此萼綠君欲  
言嬌不吐藏意久未分最憐月初上濃香夢中間蕭然  
六曲屏西施帶微醺叢深珊瑚帳枝轉翡翠帟譬如追

風騎一抹萬馬羣銅瓶汲清泚聊復為子勤願言少須  
臾對此髯參軍

墨莊漫錄未利嶺外人或云抹麗謂能掩衆花也顏持約謫官嶺表時作詩云云

題李叔班山水橫卷

青山為誰高影壓三百里竹深已迷橋荷密半藏水區  
區名利人坐暝真可鄙慨想雲屋中恐是古君子

通江石泉滑崩崖朝雪重牧兒心苦飢牛寒挽不動誰  
人倚長松曾有九雲夢西風吹屋動一笑無與共

後村詩話



王希深合和新香烟氣清灑不類尋常可以為道  
人開筆端消息

玉水沈沈影銅爐裊裊烟為思丹鳳髓不愛老龍涎  
皁帽真閒客黃衣小病仙定知雲屋下繡被有人眠

香來

宋齊愈

齊愈字文淵靖康初官諫議大夫建炎初以推  
舉偽楚論死

絕句

向來松檜喜無恙坐久復聞南澗鐘隱隱修廊人語絕  
四山滴瀝雪鳴風

宮詞

禁城春水碧溶溶洗出桃花萬片紅葉上細看無一字  
始知無女怨春風

睢陽道中

竹溪噎絕雨纔通無數深紅閒淺紅山店落英春寂寂  
青旗吹盡柳花風

以上能改齋漫錄

張澂

澂字達明舒州人靖康初官監察御史建炎南渡至尚書右丞寓居臨川有澹巖集

源潭

露漿依灘急霜颺入鬢清秋痕到晴樹江勢擁孤城野鶴疑仙羽檣烏伴水程故園千嶂外白首不勝情

撫州府志

仰山

蕭寺藏幽谷谿流燕尾分松蘿諸澗合鐘鼓上方聞寶

塔開晴日龍潭隔暮雲躋攀窮勝境援鶴似為羣

袁州府志

賀允中

允中字子忱靖康中為郎中紹興中拜參知政事

李伯紀丞相挽詩

已矣經邦業茫然造物心人生固有定天意頗難堪此日嗟亡鑑當年用作霖吾皇方願治十事想遺箴

梁溪集附

李儔

儔汴京留守靖康間陷于金

挽張忠文公叔夜

命世文章伯鴻樞柱石臣殞身因衛社嗣德豈無人丹旒西原路輶車萬里春一門蒙待遇徒有淚霑巾

雲麓漫抄張忠文公叔夜稽仲靖康間以南道總管知鄧州首提兵勤王以不推戴異姓取過軍前既議和傳到訃音云靖康丙午閏十一月內提兵次安上門除簽書樞密院在國子監街東陶潛園子內住十二月二十五日京城破以不推戴異姓取過軍前丁未年三月二十七日離京北去道中不食至白溝或曰過界河也仰天大呼遂不復語明日薨在易州孤山寨五月

十六日也擡三程遂火化第六子仲熊字慈甫  
隨行祭祀丁巳年十一月十八日到東京相國  
寺慧林禪院後于天壽院前幕士馮直家下戊  
午年十月十七日葬于陽翟縣旌忠功德墳寺  
及錄到挽詩四首

### 上官仲恭

句

君不見喬木參天獨樂園至今猶是溫公宅

朱子語類蔡京父子在京城之西南坊對賜甲  
第四區極天下土木之工一曰太師第乃京之  
自居也二曰樞密第乃攸之居也三曰駙馬第  
乃輝之居也攸妻劉乃明達明節之族有寵而

二劉不能容乃出嫁做權寵之盛亞之京做四第對開金碧相照嘗見上官仲恭詩一編其間有城西曲言蔡氏侈奢敗亡之事最為豪健末句云云仲恭乃上官彥衡之子也惜其詩不行于世

呂渭老


渭老字聖求嘉興人宣靖閒朝士

有感

塵斷征車杳雲低毳帳深古今那有此天地亦何心

稿

李詩繫





宋詩紀事卷四十二

欽定四庫全書

宋詩紀事卷四十三

錢塘厲鶚撰

朱弁

弁字少章徽州婺源人建炎初授修武郎借吉  
州團練使副王倫使金通問被拘凡十九年紹  
興十二年始與洪皓張邵南歸易宣教郎直祕  
閣主管佑神觀卒有聘遊集輶軒唱和集曲洧  
舊聞風月堂詩話行世

宋史本傳弁留金王倫先歸以弁奉送徽宗大  
行之文為獻其辭有曰歎馬角之未生魂消雪  
窖攀龍髯而莫逮淚灑冰天帝讀之感泣

北人以松皮為菜予初不知味虞侍郎分餉一小  
把因飯素授廚人與園蔬雜進珍美可喜因作一  
詩

吾老似出家晚悟媿根鈍滋旨卻羶葷禪悅要親近偉  
哉十八公茲道亦精進舍身充刀几割體絕嗔恨鱗皴  
老龍皮鳴齒溢芳潤流膏為伏龜千歲未須問便堪奴

筍蕨詎肯友芝菌跣跣得一飽萬事皆可擯侍郎文懿  
後落落衆推俊澹然世味薄內典得所信香厨留淨供  
頻食不言頓宴然默不語草木雷音震得法於此公骨  
髓傳心印應憐持節人餉此為問訊欲將無上味為我  
洗塵釜食之不敢餘感激在方寸

予以年事漸高氣海不能熟生煩冷旅中又無藥  
物遂用火攻之策灼艾凡二百壯吟呻之際得詩

二十韻

不作漳濱臥年侵氣血衰據鞍思少壯攬鏡歎清羸有  
病方求艾無營莫問著心知出下策理勝遇中醫陽燧  
神逾速銅仙術盡施論功鄙炮製取穴辨毫釐火帝恩  
光異炎官績用奇書螢比差似珠蟻迫方知忖物嗟炮  
鼈觀形笑灼龜煙微初炙手氣烈漸鑽皮閉目書徒展  
支頭枕屢移發狂還自哂賈勇僅能支宋鷁追風日吳  
牛喘月時忠言勞緩頰善謔為開眉服氣工夫遠燒丹  
歲月遲衛生防後患伐性釋前疑展轉那成夢呻吟且

當詩因心念民瘼出位歎身卑欲已七年病當從百世  
師保身將保國未可廢箴規

元夕有感

朔雪餘千里東風徧九州關河中土異燈火上元愁綠  
蟻嘗新釀青貂戀故裘紫姑無問卜世事正悠悠

炕寢三十韻

風土南北殊習尚非一躅出疆雖仗節入國暫同俗淹  
留歲再殘朔雲滿崖谷禦冬貂裘敝一炕且跼伏西山

石為薪黝色驚射目方熾絕可邇將盡還自續飛飛湧  
玄雲燄燄積紅玉稍疑雷出地又似風薄木誰容鼠棲  
冰信是龍銜燭陽曦助喘息未害搖空腹惠氣生袴襦  
仍工展拳足豈惟脫膚鱗兼復平體粟負暄那用詫執  
熱定思沃收功在歲寒較德比時燠雖餘炙手焰寧有  
爛額酷矧當凝沍晨炎帝獨回轂玄冥真退聽祝融端  
可錄嗟予亦何者萬里歌黃鵠偃仰對窗扉妍暖謝衾  
褥壯懷羞竈媚晚悟笑突曲因思墮指人暴露苦皸瘃

頻年未解甲，蹈此鋒刃毒。遙知革輅中，盱食安豆粥。陪  
臣將命來，意懇誠亦篤。有奇不能吐，何術止南牧。君心  
想更切，臣罪何由贖。此身雖自溫，此志轉煩促。論武貴  
止戈，天必從人欲。安得四海春，永作蒼生福。聊擬少陵  
翁，秋風賦茅屋。

客懷

兵氣常時見，客懷何日開。形骸病自瘦，鬢髮老相催。已  
負秦庭哭，終期漢節回。風雷識我意，一雨洗氛埃。



白髮

白髮使車前煙波思渺然霜清穫稻日風急授衣天客  
館但愁坐釣舟誰醉眠乘槎會有便直到斗牛邊

劉善長出示李伯時畫馬圖

俯首舉尾拳一蹄掣韁欲嗅驕不嘶奚官聳肩兩足垂  
意貌自與造父齊雞目麟鬣鳳凰臆玉山禾遠未容食  
籊雲追電有餘地置之畫圖人豈識精神權奇孰可班  
當在白兔青龍閒君知此馬從何來龍眠胸中十二閑

謝崔致君餉天花

三年北饌飽羶葷佳蔬頗憶南州味地菜方為九夏珍  
天花忽從五臺至崔侯胸中散千卷金甌名相傳雲裔  
愛山亦如謝康樂得此攜歸豈容易應憐使館久寂寥  
分餉明明見深意堆盤初見瑤草瘦鳴齒稍覺瓊枝脆  
樹雞溼爛慚叩門桑蛾青黃漫趨市赤城菌子立萬釘  
今日因君不知貴乖龍耳僅免一割沙門業已通三世  
偃戈息民未有術雖復加飧祇增媿雲山此去縱不遠

口腹何容更相累  
報君此詩永為好  
捧腹一笑萬事置  
送春

風煙節物眼中稀  
三月人猶戀褚衣  
結就客愁雲片段  
喚回鄉夢雨霏微  
小桃山下花初見  
弱柳沙頭絮未飛  
把酒送春無別語  
羨君纔到便成歸

攄抱

客滯殊方久  
山圍絕塞深  
秋風入橫笛  
夜月傍霜襟  
造膝他時語  
捐軀此日心  
飛霜滿明鏡  
髮短不勝簪

李任道編錄濟陽公文章與僕鄙製合為一集且以雲館二星名之僕何人也乃使與公抗衡獨不慮公是非者紛紜於異日乎因作詩題於集後俾知吾心者不吾過也庚申六月丙辰江東朱弁書

絕域山川飽所經客蓬歲晚任飄零詞源未得窺三峽使節何容比二星蘿薦施松慙弱質蒹葭倚玉怪殊形

齊名李杜吾安敢千載公言有汗青

濟陽公謂宇文叔通叔通受官而少

章以死自守恥用叔通見比故此詩以不敢齊名自託至於書年為庚申與稱江東朱弁者蓋亦有深意云

句

平生所愛曾莫倦天遣花王慰吾願姚黃三月開洛陽  
曾觀一尺春風面

謝范祖平朝散惠姚花

曲洧舊聞

陳東

東字少陽鎮江丹陽人以貢入太學欽宗時率  
其徒伏闕上書論蔡京王黼等誤國姦狀又上  
書請留李綱高宗即位召至行在上書乞罷黃

潛善汪伯彥會布衣歐陽澈亦上書言事潛善  
遽以語激怒高宗與澈同死于市越三年高宗  
感悟贈東承事郎紹興四年加朝奉郎祕閣修  
撰有盡忠錄

戴埴鼠璞靖康中孫觀論太學生陳東誘衆伏  
闕為亂建炎中黃潛善輩寘東極刑觀潛善不  
足道也張魏公亦奏胡瑗筆削東書欲使布衣  
挾進退大臣之權幾至召亂遂以諷諭狂生規  
搖國是將理追勒編置或謂魏公乃潛善客理  
則李綱客也因借此去之公為一代人物宗主  
亦復有此失高宗特以靖康之闕為懼不欲伏  
闕卻不以言罪人他日贈東官祭東墓贍其家

而官其後以生前布衣為身後法從于東亦無憾嘗曰朕即位聽用非人至今痛恨之贈官推恩未足稱朕悔過之意死者不可復生追痛無已聖心惻怛如此予深為魏公惜之

與虞章舜卿二表弟李明游兼勝亭有作

野曠湖山遠林深松竹幽舊題看壁立前事逐萍浮荏苒荒三逕依稀度九秋故人應念我雅會莫遲留

與士繇遊金山翌日分袂

早別金山恰曉鐘離帆分破一江風瓜洲渡口波聲遠

後夜相思明月中

以上盡忠錄

句

飛廉囚下鄴都獄急使飛雪作水流潺潺東方出日還

照耀坐令和氣生人寰

大雪在太學作

梅磎詩話

歐陽澈

澈字德明撫州崇仁人建炎初徒步走行在伏

闕上書請誅汪黃等與陳東俱死于市紹興中

贈祕閣脩撰有飄然先生集

秋試下第有感



籬菊金英歎異香  
杜門岑寂獨持觴  
風掀脫葉橫斜舞  
雲襯平林淺淡黃  
塞管有情增哽咽  
野花無緒伴淒涼  
不禁景物撩秋眼  
剩與新篇付錦囊

重遊寥陽洞有感

尋真曾到寥陽殿  
小立廊腰花影轉  
飛瓊仙子下瑤臺  
綽約雲鬟眼波剪  
水沈煙斷一簾秋  
醉睡海棠紅玉軟  
武陵歸去探年華  
揚州夢覺江波遠  
重來風物恰依然  
愛日融融素煙卷  
洞門寂歷鎖長春  
異木槎枒插天半

霞衣冉冉媚東風  
綠瑣窗前重識面  
酒酣春筍理琵琶  
曲終依約含幽怨  
人間名利幾時休  
馬蹄不駐空留戀  
桃花流水古猶今  
回首碧雲人不見

戲促朝宗酒約

雨收雲海湧金盆  
簾卷香絲破篆紋  
雙陸無心酬白壁  
十千有約醉紅氍  
哦詩誤許聯師服  
載酒真當過子雲  
待遣秋娘呈妙舞  
春衫已把水沈熏

臨溪弱柳

柳弄嬌黃暖律催臨溪約畧笑殘梅鴨頭春水回環綠  
龜甲屏山掩映開媚日依依籠霧閣搖風裊裊拂煙桅  
柔絲恨不同攀折獨立江皋首重回

曉發吳城山

風掃陽侯雪陣平雨催摩詰畫圖成氣吞浦溆重林盡  
秋著江湖去鳥明厚祿故人無一字長年三老伴餘生  
會須滿意開懷抱到眼廬山不世情

以上飄然先生集

曲端

端字平甫一字師尹鎮戎軍人建炎初累官威  
武大將軍涇州防禦使為張浚所忌誣以反下  
恭州獄糊其口燬之以火乾渴求飲予以酒九  
竅流血死

三朝北盟會編張浚既失全陝退保蜀中復欲  
用曲端王庶曰不可富平之戰宣撫與曲端有  
勝負之約今日宣撫以何面目見端吳玠亦懼  
端之嚴明乃書曲端謀反四字於手心浚雖有  
殺端之意而未有罪庶等曰曲端作詩題柱有  
指斥乘輿之意曰不向關中興事業卻來江上  
泛漁舟此其罪也浚乃送端萬州羈管復令恭  
州取勘康隨先在鳳翔遭端決背一百浚以康

隨為提點刑獄公事端聞之曰吾其死也呼天者數聲端有馬名鐵象日馳四百里惜之過於息連呼鐵象可惜者又數聲既死不旬日鐵象亦斃

蜀中作

破碎江山不足論何時重到渭南村一聲長嘯東風裏多少未歸人斷魂寶退錄

鶴林玉露曲端在陝西甚有威望張魏公宣撫擢用之金人萬戶羅索與薩里哈等寇邠州端擊敗之至白店原又大敗之薩里哈乘高望師懼而號哭金人因目之為啼哭郎君後以端恃功驕恣廢不用又懼其得士心竟殺之自端之死衆心稍離金人再戰于富平我師詐張端旗

以懼敵羅索知端已死撫掌笑曰何紹我也于是盡銳力攻我師敗績自是陝西非我有矣宋淳熙間高廟配享洪景廬舉此為魏公罪迄不得侑食昔孔明斬馬謖已為失計魏公襲其事幾于自壞萬里長城至于詐張端旗大為拙謀徒足以召敵人之笑沮我師之氣耳端亦知書嘗作詩云破碎山河不足論幾時重到渭南村昔人詩欲挂衣冠神武門先尋水竹渭南村即此事也

## 岳飛

飛字鵬舉相州湯陰人宣和間應真定宣撫募累立戰功南渡歷少保河南北諸路招討使進

樞密副使封武昌郡開國公罷為萬壽觀使為  
秦檜所陷殞大理寺獄淳熙六年賜諡武穆嘉  
定四年追封鄂王淳祐六年改諡忠武有集

題鄱陽龍居寺

巍石山前寺林泉勝境幽紫金諸佛相白雪老僧頭潭  
水寒生月松風夜帶秋我來囑龍語為雨濟民憂

池州翠微亭

經年塵土滿征衣特特尋芳上翠微好水好山看不足

馬蹄催趁月明歸

以上岳武穆王集

題青泥市寺壁

雄氣堂堂貫斗牛，誓將真節報君雠。  
斬除頑惡還車駕，不問登壇萬戶侯。

寶退錄紹興癸丑岳武穆提兵平虔吉羣盜道  
出新淦題詩青泥市蕭寺壁間淳熙間林令梓  
欲摹刻于石會罷去不果今寺廢壁亡矣其孫  
類家集惜未有告之者

雩都華嚴院

手持竹杖訪黃龍，舊穴空遺虎子蹤。  
雲鎖斷崖無覓處，



半山松竹撼秋風

贛州府志

題池州翠光亭

愛此倚欄干誰同寓目閒輕陰弄晴日秀色隱空山島

樹蕭騷外征帆杳靄間予雖江上老心羨白雲關

清河書畫

舫

毛國英

國英衢州人

投岳侯

鐵鎖沈沈截碧江  
風旗獵獵駐危樯  
禹門縱使高千尺  
放過蛟龍也不妨

娛書堂詩話毛國英澤民之從子也以詩自鳴  
嘗經岳侯駐兵之地江禁方嚴國英投詩云云  
侯曰詩人也委舟以渡之

## 李易

易字順之江都人建炎二年高宗駐蹕維揚策  
進士為第一授簽書江陰軍判官紹興元年為  
太常博士轉工部員外郎為太常少卿遷中書

舍人改直祕閣知揚州官至敷文閣待制提舉  
江州太平觀卒于秀州

貴門卜築

亂後亦擇居筮山山輒許居民百餘家喜甚手欲舞云  
久聞公名此幸殆天與感茲鄭重意時節共難黍剡川  
非沃野地僻民更寡趁時務擷茗餘力工擣楮寡婦念  
遺秉汚池憐數畧我欲教耦耕盡力循南畝桃杏種連  
山深居可長處東鄰有節士酒酣乃發語公昔起布衣

高誼掩前古親擢類平津決見逢真主兩宮佇六飛萬  
乘思一舉交侵正倔强蠶起益旁午浩然公獨歸偶出  
寧有補默塞復何言長歎汗如雨

剡溪幽居

勝絕剡溪邊巢枝度半年燕回銜落絮魚涌接飛泉丹  
鼎山頭氣茶爐竹外煙幽居已成趣佳致若為傳

以上  
剡錄

竹西懷古

淮南昔繁麗富庶天下稱管弦十萬戶夜夜聞喧騰不

徒竹西寺歌吹相豪矜一朝烽火急塵市為溝塍風月  
無歡場睥睨皆射堦荒荒野月白照地如寒冰自從畫  
江守歲歲輸金繒蕭條閭井閒水旱又頻仍我來經故  
里日暮此一登隋唐倏已往遺跡幾廢興江山極蒼莽  
望之涕沾膺

揚州府志

俞處俊

處俊字師郝新淦人登建炎龍飛乙科未及仕  
而卒

傷春

黏天芳草綠蒙茸  
久客傷心望不窮  
山色自隨人遠近  
鶯聲只在水西東

搜春

千林欲暗稻秧雨  
三月尚寒花信風  
九節老筇應不惜  
步隨流水看殘紅

以上合璧事類前集

句

叫月子規喉舌冷  
宿花蝴蝶夢魂香

獨醒雜志

胡銓

銓字邦衡廬陵人建炎二年進士甲科紹興五  
年以賢良方正薦除樞密院編修官抗疏詆和  
議累謫吉陽軍孝宗朝歷權中書舍人兼國子  
祭酒權兵部侍郎以資政殿學士致仕卒諡忠  
簡有澹菴集

鶴林玉露胡澹菴十年貶海外比歸飲於湘潭  
胡氏園題詩云君思許歸此一醉倘有梨頰生  
微渦謂侍妓黎倩也後朱文公見之題絕句云  
十年浮海一身輕歸對黎渦卻有情世上無如

人欲險幾人到此誤平生

羸奎律隨紹興十八年新州編管人胡銓移吉陽軍編管先是廣東經畧使王鈇問知新州張棣曰胡銓何故未過海銓嘗賦詞云欲駕巾車歸去有豺狼當轍棣奏銓倡和毀謗而有是命棣選使臣游崇部封送小項洞過海銓徒步赴貶人皆憐之至雷州守臣王趙捕游崇私若械治厚餉銓趙後亦得罪

### 雷州和朱彥秀才詩時欲渡海

何人著眼覷征驂  
賴有新詩作指南  
螺髻層層明晚照  
蜃樓隱隱倚晴嵐  
仲連蹈海徒虛語  
魯叟乘桴亦謾談  
爭似澹菴乘興往  
銀山千疊酒微酣

澹菴集



到瓊州和李參政

落網從前一念斜  
崖州前定復何嗟  
萬山行盡逢黎母  
雙井渾疑似若邪  
行止非人十年夢  
廢興有命一浮家  
此行所得誠多矣  
更願從今泛北槎

貶朱崖行臨高道中買愁村古未有對馬上口占

北往長思聞喜縣  
南來怕入買愁村  
區區萬里天涯路

野草荒煙正斷魂

以上方輿勝覽

題自畫瀟湘夜雨圖

一片瀟湘落筆端  
騷人千古帶愁看  
不堪秋著楓林港

雨濶煙深夜釣寒

梅磳詩話

題畫扇

誰向生綃白團扇  
畫將羈客據征鞍  
南遷萬里知前定  
壁上崖州莫怕看

陳郁話腴胡澹菴於福州僉廳分扇得一扇畫  
古木間一人騎驢向西南行及有新興之行方  
知為先兆也

登南恩望海臺

君恩寬逐客萬里聽歸來未上凌煙閣先登望海臺山  
為翠浪涌湖拓碧天開目斷飛雲處終身愧老萊

豫章詩話時孝宗登極起為祕書少監將歸朝  
作

句

盈尺子魚來丙穴一餅女酒敵新興

夷堅志胡邦衡獲罪來福州黃思憲致子魚紅  
酒為餉胡報以詩以子對女丙對新為工新興  
酒閩人重之

陳宗古

宗古字述之侯官人建炎二年進士終朝奉郎

遊大滌山

洞天三十六竒邃此無儔笙鶴有時下神仙何處遊巖

花自照水谷鳥不啼秋盡日松陰底閒聽寒澗流

洞霄詩集

鄧柞

柞字成林沙縣人建炎二年進士累官知隆興府江西安撫使有焦桐集

題白蓮院

古樹紛紛千嶂雨遠寺鳴鐘迷處所一水東流浮落花  
隔雲應有秦人住海風不斷長松路萬籟寒生蒼玉塵  
此去江南山更深枕榔葉暗猿啼苦

南安縣志

陳剛中

剛中字彥柔閩清人祥道從子建炎二年進士  
紹興間任太府丞應詔上封事胡銓貶韶州剛  
中作啟事賀之忤秦檜謫定遠縣卒

陽關詞

客舍休悲柳色新  
東西南北一般春  
若知四海皆兄弟

何處相逢非故人

北窗炙輠

### 石材廟題柱

疏爵新剛應論功  
舊石材能形文母  
夢還訝佞人來海  
市為誰出衡雲  
豈自開乞靈如見告  
逐客幾時回

鶴林玉露寺丞南行時吉州江濱有石材廟隆祐太后避金兵泊舟廟下夢神告以兵至即發舟指章貢金兵追至造口不及而還寺丞題詩廟柱云云卒不如願悲夫

### 飛來峯

寒峯插天出玲瓏萬箇苞微風起松際怪石勢搖撼上  
有百尺松幽花綴紅糝野猿忽躍去滴下露千點回首  
冷泉亭天鏡光潏潏游姬脩眉青嬌童兩髦髧平生山  
水癖如人嗜昌歎對此一壺酒玉色翻醉臉路逢老祝  
髮絳袍金光閃茲山信自佳恨為緇塵染置之且復醉  
天竺鼓紉紉咸淳臨安志

阮閱

閱字閱休舒城人宣和中知郴州建炎初知袁

州有詩話總龜松菊集

郴江百詠

并序

存六首

郴古桂陽郡陳迹故事盡載圖史亦間見于名人才  
士歌詠如杜子美寄聶令入郴州韓退之郴江柳子  
厚登北樓沈佺期望仙山戴叔倫過郴州之類是也  
山川寺觀之勝城郭臺榭之壯未經品題者尚多亦  
可惜爾余官于郴三年常欲補其闕愧無大筆雅思  
可為然因暇日時強作一二小詩遂積至於百篇雖



不敢比迹前輩使未嘗到湖湘者觀之亦可知郴在  
荆楚自是一佳郡也宣和甲辰二月中和日舒城阮  
閱序

東樓

危城雉堞對東山誰剗高樓十二欄獨鶴不來松已老  
春風動處日三竿

山陰堂

修竹蒼蒼似剡川浮觴可繼永和年不知誰有羲之筆

欲寫蘭亭第二篇

碧虛亭

筇竹枝彎屐齒搖登臨身覺在煙霄  
千峯險似三川峽  
一水深如八月潮

湖亭

城外高堂俯碧灣山如螺黛水如環  
有時鼓棹來尋勝  
直到斜陽未欲還

蘇仙觀

寂寂星壇長綠苔井邊橘老又重栽城頭依舊東樓在  
未見當時鶴再來

東山

藜杖芒屨過水東紅裙寂寞酒尊空郡人見我應相笑  
不似山公與謝公

以上郴州文志

宣風道上

馬蹄西去夕陽催濃淡寒山翠作堆北鴈無情怕秋熟  
帶將寒信過江來

題春波亭

數葉荷衣一短蓑春波亭上倚斜暉無人會得詩中畫

凭盡闌干又獨歸

以上袁州府志

胡嶧

嶧字仲達崑山人建炎初任安遠尉有如村豪

遊慧聚寺

政欲相攜紫翠間不堪風雨徑催還何時更上月華閣

細認仙山是假山

玉峯詩集

黃大輿

大輿字載萬南渡初蜀人號岷山耦耕嘗輯梅

苑

華亭山房象山

客游厭城市僧房見巖壑偉石羅衆峯寒砂結層堦為  
谷既窈窕置嶺復綿邈溪源互相注花草紛已錯空聞  
先王夢徒觀楚臣作行雲在俛仰北渚應酬酢天機契  
如幻意匠起冥漠周流屬多豫寤寐欣所託有懷山中

人從爾芳杜若

成都文類

王銍

銍字性之汝陰人自稱汝陰老民南渡寓居剡  
中建炎初為樞密院編修官有雪溪集

追和周昉琴阮美人圖

龍眠李亮工家藏周昉畫美人琴阮圖兼有宮禁富  
貴氣象旁有竹馬小兒欲折檻前柳者亮工官長沙  
而黃魯直謫宜州過見之嘆愛彌日大書一詩於黃

素上曰周昉富貴女衣飾新舊無髻重髮根急薄妝  
無意添琴阮相與娛聽弦不觀手數腴竹馬郎跨馬  
要折柳此畫後歸禁中胡馬驚塵流落何許而詩亦  
世不傳獨僕舊見之位置猶可想像也病中追和其  
詩當令善工試圖之耳

丹青有神藝周郎獨能兼圖畫絕世人真態不可添卻  
憐如畫者相與落誰手想像猶可言雨重春籠柳

雪後渡西溪

雪後孤村一段煙晴光遠照玉山川酒旗隔步招閒客  
獨上西溪渡口船

上方

松閒清月佛前鐙菴在孤峯更上層犬吠一聲秋意靜  
敲門知有夜歸僧

以上雪溪集

王文孺臞菴

全家高隱白雲關事不縈懷夢亦閒欵乃交撐漁市散  
隔江城郭是人間



山村

家依溪口破殘村身伴渡頭零落雲更向空山拾黃葉

姓名那有世人聞

墨莊漫錄

雲門寺

青山春又到白髮策烏藤已是他鄉客還同寄住僧瘦  
松黏凍雪流水帶寒冰更覺蒼崖路雲深不可登

越咏

周 芑

芑字秀實錢唐人邦彥弟邦式之子南渡初廬

陵倅

贈劉美中尚書

劉郎校書天祿閣太白下觀光照灼心知漢祀厄中天  
夜半瞻星涕零落

獨醒雜志宣和中太白見甚高尚書劉公才邵  
時在中祕見而歎曰是兵象也國家其有外患  
乎因與僚友同觀憂形于色未幾金犯畿甸後  
周芑秀實來倅廬陵贈詩云云

鄭曷

曷字彥明南渡初人

題閻立本十八學士圖

閻公十八學士圖當時妙筆分錙銖惜哉名姓不題別  
但可以意推形模十二匹馬一匹驢五士無馬應直廬  
五鞍施絨乃禁從長孫房杜王魏徒一人醉起小史扶  
一人欠伸若挽弧一人觀鷺憑闌立一人運筆無乃虞  
樹下樂工鳴瑟竽八士環列按四隅笑談散漫若飲徹  
盤盃杯勺一物無坐中題筆清而癯似是率更閒論書  
其中一著道士服又一道士倚枯株三人倚樹各相語

一人繫帶行徐徐後有一人豐而鬚獨吟芭蕉立踟躕一時  
登瀛客若是貞觀治效真不誣書林我昔曾曳裾三局腕脫幾  
百儒雄文大筆亦何有餐錢但日糜公廚邦家治亂一無補  
正論出口遭非辜時危玉石一焚埽覽畫思古為嗟吁

獨醒雜志予嘗得登瀛圖本規模布置氣象曠  
雅每思初始者必非俗筆又有石本皆書名氏  
後有李丞相伯紀贊跋乃欽廟在東宮得閣立  
本此畫親為題識以賜詹事李詩二本絕不同  
嘗見鄭昂所賦長句云云考其所序列意鄭必  
為畫本賦之然長孫王魏元不在其中不知鄭  
詩何為及之耶按翰林盛事記開元中張燕公  
等十八人為集賢學士於東都含象序圖寫其

貌意二本必居其一而後人皆以為貞觀學士耳

李宏

宏字彥恢宣州人宣和初以左丞直郎署涇縣建炎中呂好問知宣州得士四人詹友端周紫芝王相如與宏也紹興初李光為守復檄署縣累遷轉運使遊金泉觀

昔時謝女昇天處此日遺蹤尚宛然蟬蛻舊衣畱石室龍飛勝地涌金泉碑書故事封蒼蘚殿寫真容鎖翠煙

薄暮松巔聽鶴唳凌空髮髯是神仙

四川總志

許顗

顗字彥周建炎中襄邑人有詩話

夢中作

閒花亂草春春有秋鴻社燕年年歸青天露下麥苗溼  
古道月寒人迹稀

彥周詩話宣和己亥僕在洪州宿城北鄭和叔  
家夜夢行大路中寒沙沒足其傍皆田苗丘隴  
一婦人卑衣素裳行田間曰此中無沙易行僕  
從之不能登婦人援僕手登焉月明如晝彌望

皆野田麥苗婦人求詩僕藉草坐有矮輓臺一  
上有紙筆僕題詩四句云云拍筆輒上有聲驚  
覺宛然記憶是歲大病後亦無他故

秋雨

零雨不出動隔旬門前秋草長于人江湖浩渺欲無岸  
錦石最小猶生雲微陽片月何曾見只有莓苔昏筆硯

田家黍穗未暇悲茅屋且為螢火飛

宋藝圃集

秦湛

湛字處少游子

句

大勝商山老同居一木奴

詩說雋永秦處度為韓膺胄作枝巢詩建炎間在會稽先得兩句以語後未知成篇不

蔡向

建炎中承議郎提舉兩浙常平事

題隱真宮

福地流傳號隱真  
麻姑曾款蔡翁門  
白春雲子自堪飽  
井溢丹泉便可吞  
山露五峯疑指爪  
溪盤百疊想羣痕



我來既躡靈蹤後知是仙家第幾孫

赤城志

聞人偲

偲天台寧海尉

淨因院建炎兵火獨存紀事

湖海浮家二十年重來春色尚依然杏花籬落歎紅霧  
楊柳池塘護綠煙草暖邦人出游地鳩鳴刺史勸耕天  
覺場獨在三災外試問支郎第幾禪

至元嘉禾志

張瓊

瓊官舒州守

雨中自萬壽宮歸

草草登臨未擬回  
煙昏雨溼賦歸哉  
山寒未放遷鶯出  
地勝先聞駕鶴來  
老去春光都是夢  
嬾邊心事總如灰  
歸尋藥裹扶筋力  
準擬東風得屢陪

安慶府志

顏岐

岐字夷仲復子建炎中累官至門下侍郎

句

念昔從學日同升夫子堂

萬姓統譜顏夷仲嘗從滎陽呂公學呂居仁為  
濟陰主簿時夷仲適在曹南贈居仁詩云云夫  
子蓋謂滎陽公也居仁罷官歸作詩留別夷仲  
云昔日同升夫子堂如今俱是鬢蒼浪蓋用其  
語也

李方敬

秋蜨

粉蜨爾何知秋深尚戲飛憐渠迷節物猶若弄春暉露  
葉今非昔霜叢疇可依籬邊菊無幾薄命寄餘菲

合璧  
事類

別集

陳石齋

葵花

俗名一丈紅

恐是牡丹重換紫又疑芍藥再翻紅  
嬌饒不辨桑間女  
蔽芾深迷苧下翁

合璧事類別集

徐月溪

麗春花

照眼裝新就扶頭酒半醒  
妖姿隨變化薄命易飄零

合璧

事類別集

唐觀

南郊仗迴

傳警千門寂南郊綵仗迴但驚龍再見誰識日雙開德  
澤施雲雨恩光變燼灰閱兵貔虎振聽樂鳳凰來

合璧事類

外集

陳貫道

貫道字致一閩人

題嚴陵釣臺

足加帝腹似癡頑  
詎肯折腰求好官  
明主莫將臣子待  
故人只作友朋看

庚溪詩話云自出新意

程 宿

送葉善卷致仕歸吳

衛尉新除蓋次公  
便拋簪紱向江東  
秋鱸正與蓴絲美  
夜鶴休驚蕙帳空  
滿腹詩書元未試  
會心林壑許誰同

自憐華髮無歸處  
慚媿冥冥物外鴻

吳郡志

唐 韜

韜南渡初人

題巫山神女廟

楚澤隱巫山  
翠壁開鴻濛  
萬流束長峽  
怒浪日簸舂  
朝暉澹高唐  
岳阿閼彤宮  
杳杳散煙霧  
榮光繞長虹  
恭聞雲華君  
少陰體冲融  
受道紫清闕  
飛化凌三空  
徜徉江海  
上千騎  
馳蒼龍  
羽節回天津  
央央弭層峯  
悽惻下土

人昏墊無所容寶書授神禹百靈倏奔從蛟螭委鞭策  
山川奠西東九州免為魚遂成萬世功嗟余晚聞道蓬  
心蔽倥侗維舟垂崖邊再拜望遺蹤嶙峋山頭石雲衣  
尚溶溶縹緲玉瑛臺如在指顧中童律不可問至言誰  
擊蒙仰首天壇下松柏悲回風

名勝志

令狐慶譽


慶譽南渡初人

題雲安下岳



地遠塵寰絕點埃  
懸崖屈曲寄層臺  
山頭玉溜隨檐滴  
岳下金容就石開  
寺影不妨流水過  
松香長逐好風來  
徧游未盡無窮景  
為報舟人且莫催

名勝志



宋詩紀事卷四十三

欽定四庫全書

集部

宋詩紀事卷四十四

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣牛稔文

謄錄監生臣黃鑫

欽定四庫全書

宋詩紀事卷四十四

錢塘厲鶚撰

何遠

遠字子遠號韓青老農浦城人去非之子東都  
遺老入南渡尚存著春渚紀聞

章序臣得銅雀硯屬余作詩

阿瞞示姦雄挾漢今天下惜時無英豪磔裂異肩踝終  
令盜坏土埏作三臺瓦雖云當塗高會有食槽馬人愚

瓦何罪淪蟄翳梧櫨錫花封雨苔鴛彩晦雲罅當時丹

油法

銅雀瓦用鉛丹雜胡桃油  
搏治火之取其雨過即乾

實非謀諸野因之好

奇士探琢助揮寫歸參端歛材堅澤未渠亞章侯捐百

金訪獲從吾詫興亡何足論徒足增忿罵但嗟瓦礫微

亦以材用捨徒令瓴甃餘當擅瓊瑰價士患德不備不

憂老田舍

春渚紀聞

何 邀

邀字子薦遠從兄寓居餘杭與友張圖南伯鵬

俱早世遠集二人遺句名南金錄

句

不使翠分旁牖去卻緣清甚畏人知

賦藏筠軒紀聞

春渚

張圖南

圖南字伯鵬餘杭人

句

坐中競病分明久驢上推敲元未裁

春渚紀聞圖南督予分韻詩未就有詩云云用事精穩如老作者惜乎天不少假之年以觀其

所止也

卷四十四

鄭魁

賦林叔睿端硯

仙翁種玉芝耕得紫玻璃磨出海鯨血鑿成天馬蹄潤  
應通月窟洗合就雲溪常恐魍魎奪山行亦自攜

春渚紀聞永嘉林叔睿所藏端硯馬蹄樣深紫色厚寸許而徑七八寸下鄭魁銘詩隸字甚奇末句所寄旨哉

莊綽

綽字季裕清源人官鄂州守有雞肋編

程致道云季裕著本草蒙求三卷甚工

軒渠錄莊季裕年未甚老而體極癯瘠洪析仲本呼為細腰宮院子

建炎三年七月寓長洲白馬澗張氏舍題壁

昔年隨牒作邊侯愁望長安向戍樓今日衰顏來澤國

又看烽火照長洲

雞肋編

和吳正仲觀李廷珪墨

賴召陳元典籍傳骨教邊腹擅便便竟誇削本真餘事

卻笑磨人得永年三友不居毛穎後五車仍在楮生前  
祇愁公子從醫說火燉生分不直錢

雞肋編吳升正仲家蓄唐以來諸李所製墨無  
出廷珪之右者其堅利可以削木王彥若墨說  
云趙韓王從太祖至洛行宮見架上篋取視  
皆李氏父子墨也因盡以賜王後王之子婦蓀  
中血運危甚璽求古墨為藥因取一枚投烈火  
中研末酒服即愈諸子欲各備產乳之用乃盡  
取墨燉而分之自是李氏墨世益少得

姜光彥

光彥字仲謙號松菴淄州人



已酉中秋任才仲陳去非會飲岳陽樓上酒半  
酣高談大笑行草閒出誠一時俊遊也為賦之  
岳陽樓高幾千尺俯視洞庭方酒酣萬頃波光天上下  
兩山秋色月東南興來鸞鵲隨行草夜永魚龍駭笑談  
我欲煩公釣鰲手盡移雲水到松菴

岳州府志

周莘

莘字尹潛錢唐人邠之孫為岳陽決曹掾與陳  
去非為友

野泊對月有感

可憐江月亂中明，應識逋逃病客情。  
斗柄闌干洞庭野，角聲淒斷岳陽城。  
酒添客淚愁仍濺，浪卷歸心暗自驚。  
欲問行朝近消息，眼中羣盜尚縱橫。

瀛奎律髓

康與之

與之字伯可，渡江初以詞受知高宗。官郎中有順菴樂府。

鶴林玉露：建炎中大駕駐維揚，伯可上中興十策，名聲甚著。後秦檜當國，乃附會求進，擢為臺

郎值慈寧歸養兩宮燕樂伯可專應制為歌詞  
諛豔粉飾于是聲名掃地世但以比柳耆卿輩  
矣檜死伯可亦貶五羊

### 題宣和御畫扇

玉輦宸遊事已空尚餘奎藻繪春風年年花鳥無窮恨  
盡在蒼梧夕照中

程史康與之在高皇朝以詩章應制與左璫狎  
適睿思殿有徽祖御畫扇上時持玩流涕璫偶  
下值竊攜至家而康適來留之燕飲漫出以示  
康給璫入取肴核輒泚筆几間書一絕于上有  
頃璫出見之大恐而康已醉無可奈何明日伺  
聞叩頭請死上大怒亟取視之天威頓霽但一

慟而已

僻居

巷僻過從少柴門盡日關鶯聲常在柳雲影不離山有  
道難言闕雖貧未厭閒川原煙四暝春思有無間

鷺

春暗汀洲杜若香風標公子白霓裳碧天片雪忽飛去  
何處人家水滿塘

琵琶

夜深琵琶聲似裂一曲霓裳一庭月曲終人影在西階  
困倚東風步搖折

可惜

簾幕重重下玉鉤隔簾春在柳梢頭東風著意相料理  
吹去楊花不自由

以上前賢小集拾遺

題清江慧力寺

天涯芳草盡綠路旁柳絮爭飛啼鳥一聲春曉落花滿  
地人歸

江上濃陰曉未開，瘦筇支我上蒼苔。  
春寒前日去已盡，今日又從何處來。  
詩人玉屑

招真詞

并記

自姑蘇出齊門，沿而北望山如巨。  
鰲常熟縣之虞山也，邑去江不及程。  
陂湖畝澮之積，自南至者傾馳會于江。  
江河既應，則迅瀾倒流，二水相制，移時而不能去。  
山無奇谷，惟荒墟白草，醜石陂陀，迤邐而西，有修林橫抹，隱見于兩山之間。其中為招真菴，元祐中道。

人申氏海陵徐處士弟子也松林森茂庭宇簡寂如  
隱君子之居通州道士喻抱元增治之舊名竹陵自  
是更以招真請記于僕乃歌招真之詞以系之曰

白鶴巢兮丹井空蓬山杳兮煙霞濛濛陵谷變兮今古木  
葉下兮秋風飛仙去兮朝太微黃冠野服兮以遊以嬉  
餐霞臥月兮世不我違與世滌映兮天門可馳蒼龍嘯  
兮雲漫靡石泉冽兮山芋肥俯仰宇宙兮日月蔽虧靈  
秀回薄兮野芳呈姿山中之樂兮萬化莫移仙人不來

今隱者曷追

蘇州府志

李唐

唐字希古河陽三城人徽宗朝補入畫院建炎  
閒太尉邵宏淵薦之授成忠郎畫院待詔賜金  
帶

圖繪寶鑑李唐年近八十善畫人物山水筆意  
不凡尤工畫牛高宗雅重之嘗題其長夏江寺  
卷云李唐可比唐李思訓

畫繼補遺建炎南渡李唐如杭得幸高宗余家  
有唐畫胡笳十八拍高宗親書劉商辭留空絹  
俾唐圖寫亦見高宗雅愛唐畫也



題畫

雲裏煙村雨裏灘看之容易作之難早知不入時人眼  
多買燕脂畫牡丹

郁氏書畫題跋記錢唐宋杞云唐初至杭無有知者貨楮畫以自給日甚困有中使識其筆曰待詔作也唐因投謁中使奏聞而唐之畫杭人即貴之嘗有詩云云

張九成

九成字子韶號無垢居士開封人徙家錢塘紹興二年進士第一歷宗正少卿兼侍講權刑部

侍郎累謫南安軍起知溫州丐祠卒贈太師封  
崇國公諡文忠有橫浦集心傳錄日新錄論語  
詩

南安寶戒院作

苦無人事擾閒居贏得終年學著書今日欣然出門去  
秋風吹意滿芙蕖

橫浦心傳錄

菩提寺

高僧居物外有戶晝常扃海濶知天大泉甘識地靈一

簾春月靜數點別山青便卜歸歟計移文休勒銘

詩林萬選

遺樊茂實硯

詩刻硯後

端溪石硯天下奇紫光夜半吐虹霓不隨凡石追時好  
真與日月爭光輝韜藏久矣不亂用唯恐翰墨汙染之  
樊子文章有餘地汪汪萬頃誰能窺贈君此硯無輕棄  
經史妙處其發揮飛流濺沫徧天下要使咳唾皆珠璣

游宦紀聞

施德操

德操字彥執鹽官人與張九成子韶楊璇子平  
號三先生著北窗炙輠

廣福禪院

在鹽官有雪峯禪師手鑿井

何處登臨眼最明雪峯佳處一川平  
潮從海月生時上峯在雲天盡處橫  
幢蓋神扶喬木影風雷井閉古泉聲  
靈蹤鑿盡翻惆悵何日關山報道成

咸淳臨安志

楊璇

璇字子平鹽官人與施德操同時里人號德操

為持正先生璇為謹獨先生

東山廣福院

在鹽官院有葛仙翁井

檣檣青山下來尋薊子家人魚皆靜樂水木亦清華松

老已成蓋菊寒殊未花何須覓句漏此地有丹砂

咸淳臨安

志

西山廣福院

在海寧紫微山

地勢連滄海名山號紫微景閒僧坐久路僻客來稀峽

影清相照河流石自圍塵喧都不到安得此忘歸

海寧縣志

刁文叔

文叔不知其名張橫浦子韶之友

春日旅中

來時江梅散玉蘂歸去麴麥如人深桃花只解逞顏色  
惟有垂柳知客心

橫浦心傳錄云思致尤遠不止工也

陳棠

棠字德召紹興二年進士官祕書少監

晚步

晚步沙頭倚小晴  
南山正與暮雲橫  
棲鴉啼處野煙合  
飛鳥去邊孤月生  
樹暗風微花氣度  
溪深雨漲水痕平  
夜闌衣溼迷歸路  
髣髴前村燈火明

前賢小集拾遺

鄭仲熊

仲熊字行可  
衢州西安人  
紹興二年進士  
累官權參知政事  
忤秦檜落職  
孝宗即位復端明殿學士

桂花

天公憐我太岑寂每歲殷勤兩度開收拾落英將底用

博山香裏薦清杯

全芳備祖

鄭剛中

剛中字亨仲婺州金華人紹興二年進士累除

祕書少監出為四川宣撫使為秦檜所忌罷謫

桂陽軍徙封州卒檜死復原官諡忠愍有北山

集



老學菴筆記蜀人任子淵好謔鄭宣撫剛中自蜀詔歸其實秦檜欲害之鄭公有惠政衆皆太息或曰鄭不來矣子淵對曰秦少思哉人稱其敢言方萬里跋北山文簡古詩峭健在封州詩尤佳

### 修修窗前蘆

修修窗前蘆孤瘦倚青玉心虛知夜涼風葉亂相觸使我入幽夢如在江湖宿方茲困炎曦愛爾眼中綠奈何柔脆姿行犯秋霜肅霏霏霜露中菱荷等摧覆大抵無勁節不及歲寒竹

過越江見人家臨水竹可愛

何人此地得幽居水竹中間宅一區無盡江山千萬里  
有情花木兩三株應無俗客來驚犬時有扁舟過賣魚  
我欲他時成卜築更添幾架古人書

寒意

嶺南霜不結風勁是霜時日落晚花瘦山空流水悲樓  
鴉尋樹早凍蟻下窗遲季子家何在衣單知不知

辛未元夜

輕寒擁山城遠綠生春草迎神樂元夜笑語聞蠻獠惟  
有團圓月報我時節好寸燈豈為孤卮酒未為少微醺  
短檠旁人靜茅屋小

以上北山集

### 范達夫硯

范郎紫玉餘半圭翻手作雲雨電隨龍蛇起陸孔翠飛  
雲收雨霽千首詩

硯箋

### 王伯庠

伯庠字伯禮鄞人參政次翁之子紹興二年進

士官至夔州路安撫

和潘良貴題明州三江亭韻

使君不受二毛侵杖履逍遙得勝尋  
撥遣簿書聊永日登臨山水亦何心  
殘梅隨雪垂垂白弱柳搖春淡淡金  
倚矚大江供一笑幾多襦袴在謳吟

延祐四明志

陳栖筠

和潘良貴題明州三江亭韻

紅塵一點不相侵下瞰澄江幾萬尋  
地接海潮分鼎足

簷飛鳳翼峙天心三山有路雲垂幕午夜無風月涌金  
欲識龔黃報新政滿城爭唱使君吟

延祐四明志

贈泊宅翁方勺

學道悠悠未見功敢云凡質有仙風他年一鉢江湖去

先向苕溪訪葛洪

金華府志

謝伋

伋字景思上蔡人參政克家之子官至太常少

卿紹興初侍父寓居黃巖自號藥寮居士有藥

寮叢橐

妙庭觀

蕭蕭六轡天邊路  
雲竹風松正歲寒  
欲洗衰顏換凡骨  
應須九轉大還丹

雲輶一去遠難追  
丹鼎埋光固不疑  
承露仙人辭漢後  
幾重深杳隔瑤池

杭州府志

陳用中

用中字彥才永嘉人

戲作

賦命安能比鉅公偶然年月與時同只因日上爭些子  
笑向連江作醉翁

竹坡詩話紹興初有退相寓永嘉獨陳用中彥  
才雖鄰不謁及再相有薦之者止就部注邑連  
江戲作小詩云云蓋其所生年月時適與時宰  
同但日差異耳

陳述

述紹興初知袁州

化成巖

出郭二三里覽勝適願言羣山接天際一水經巖根參  
差崖上屋蕭閒松下門真趣自往古聊可開清尊

袁州府志

董穎

穎字仲達德興人紹興初從汪彥章徐師川遊  
有霜傑集

江上

萬頃滄江萬頃秋鏡天飛雪一雙鷗摩挲數尺沙邊柳

待汝成陰繫客舟

前賢小集拾遺



句

雲壑釀成千嶂雨風蘋吹老一川秋

夷堅志

高登

登字彥先漳浦人宣和間為太學生與陳東等  
上書乞斬六賊不報紹興二年廷對極言授富  
川簿轉古縣令以不肖祠秦檜父胡舜陟誣奏  
下靜江獄會舜陟以他事下獄死乃得白編管  
容州卒有東溪集

思歸

忽忽已秋杪言歸欣有期接物想吾廬青蘂繁東籬流  
匙白雲子蘸甲黃鵝兒對此憶羈旅多應歌式微喜慰  
倚門心愁銷舉案眉穉子闌檐隙繞膝牽人衣歸心念  
如許兼程猶苦遲明朝秋色裏烏帽風披披

冒寒行風雨有感

號風撼枯枿凍雨凝路塵乾坤祕日月八荒同一雲遙  
知沙漠寒黯黯愁殺人天涯望不極流淚滿衣巾

水漲謝邑宰送米

心知一字不堪煮矻矻窮年黃卷中  
食粥由來未為拙  
儲瓶況乃嗟屢空  
令君好賢婉韓愈  
賤子受賜慚盧仝  
春水從教繞舍北  
癡兒不復啼門東

中秋對月

繡江再見中秋月  
歲去月圓人尚缺  
相望千里共嬋娟  
苦恨亭亭照離別  
今夕一樽誰與同  
孟光舉案對梁鴻  
衆雛立侍儼成列  
以此持杯壽乃翁  
乃翁看月揩病目

手足傾頽頭髮禿但願團樂三十秋不計東西與南北  
以上東溪集

劉儀鳳

儀鳳字韶美普州人紹興二年進士孝宗朝累  
遷祕書少監兵部侍郎斥歸復起知漢州果州  
詠范志元

誰家遊冶郎闖首窺幽閨但見臉如花不知心是鐵一  
夕變其軀雪姿映雲髮昔為桃李顏今作松篁節

方輿勝覽純陽山在合州石照縣北唐女冠范志元得道處天寶間天使任安者至山中慕之而志元變為男子劉儀鳳有詩

自歸州陸行至夔州

戶口村無幾犁鉏力不堪林荒樗櫟壽月黑虎狼貪幽絕雲眠穩清閒谷飲甘故山深未極壤斷蓋茅菴

曠野無人宿危亭犯雨過嶺雲堆鼎負剎海現兜羅酒

觸秋懷壯天留暮色多不勝行役苦栽入竹枝歌

顧氏積書

巖選

李衡

衡字彥平號樂菴江都人紹興二年進士累遷  
監察御史出知溫婺台三州召除起居郎祕閣  
修撰致仕居崑山

慧聚寺作

盡日用登陟跣趺聊對牀巖空炫層碧草細涵幽香弔  
古漫秋思開尊已月光隨身有竿木作戲且逢塲

天面無纖靄平川灝氣吞楮筇臨閣道拂石憩雲根柳

映山前路煙搖水北村醉歸風滿袖斜月在蓬門

樂菴初成

老子平生百不足菴成那平管食無肉終朝閉戶只讀

書四面開窗都見竹以上玉峯詩纂

薛靖

靖鄞人紹興二年進士

望金山

一柱支空立濤聲春寺聞消來巴地雪飛到潤州雲寂

冥江山色縱橫盜賊羣不堪形勝裏北望涕紛紜

薛氏世風

集

孫雄飛

雄飛字翬之吳郡人紹興二年進士祕書省正

字

靈隱寺蓮峯堂

堂開金色界梵客為鉤簾山影碧侵座水聲清繞簷粉

雲埋石腳珠露泣松髯終擬攜孤笛凭闌喚玉蟾

咸淳臨安



志

楊愿

愿字謹仲清江人紹興二年進士歷簽書樞密院事兼參知政事罷提舉太平觀

伏承駒父祕校惠示見和鄙句七言四韻二首降歎之餘因成二絕往謝

冷官廳事客來稀衆綠陰陰結夏帷忽得君詩愜人意  
陶家風到北窗時

只今侍讀周夫子屢說君詩似杜詩速把冠塵盡彈卻  
玉堂宵直伴王維

愿數見侍讀侍郎周公盛稱駒父詩有句法故後篇及之

周益公題跋

汪應辰

應辰字聖錫玉山人紹興五年進士第一孝宗  
朝歷吏部尚書翰林學士出知平江府卒諡文  
定有集

輓宣撫吳郡王

節義家傳久艱難始見忠一心惟徇國百戰竟平戎環

列周廬肅官儀道路同細看麟閣上誰得似初終  
太傅元功首汾陽異姓王恩榮兼二美聲迹遠相望名  
載風雲會神遊水月鄉維師空贈典無復見鷹揚

分韻送胡丈歸建康

先生高臥武夷巔一旦趨朝豈偶然報國自期如皦日  
歸田曾不待來年懷鉛共笑揚雄老鞭馬今輸祖述先  
冊府風流久寥落送行始復有詩篇

以上汪文定公集

湯莘叟

莘叟字起莘寧化人紹興五年進士終饒州推官

馬上吟

宿雨洗山新綠嫩  
曉風吹杏淺紅乾  
沙頭路暖日初上  
行客揚鞭不覺寒

句

葛巾簪下無多髮  
茅舍門前有好山

幽居府志

以上汀州

孫起卿

起卿吳郡人紹興五年進士

江纂墓碑

家有古冢碑近自田家獲藏之五六年未甚見省錄古  
苔侵文理封結殆莫識偶然嗟其窮一一為磨剔始若  
漫無文細尋適可讀文云晉江纂長夜垂茲刻貞石殊  
不用塊然但埏埴合葬無別銘背面書反覆一字不涉  
華本枝記明白二父遂兼書于適乃宗嫡

自注誌云養父諱本父適

也

考諸晉史篇真是小出入字畫亦嶮勁然不類鐫斲

漢魏尚豐碑茲獨何褊迫豈時丁喪亂不暇治品式于  
時義熙季處次實庚戌五胡剖中華典午竄南極苟簡  
理宜爾寧詒不孝責審訂昭昭然疑去喜自適歷年七  
百餘瞥爾駒過隙名節苟不傳埃化先庀石寘茲當眼  
前用代銘几席

吳郡志江纂江適子也木瀆孫起卿頃于天平  
山下地名上沙獲墓碑乃以大方輒刻之字畫  
俱存與石無異起卿為賦詩

吳詠

詠字永言仙居人第從兄紹興五年進士仕西

安令有西安集

殊聖寺和孟戎幕韻

院靜僧疑少門幽客自稀山寒雲近屋逕狹石侵衣松

鬣蒼髯古薑芽紫筍肥騷人詩戰罷踏月夜深歸

台州府志

魯 嘗

嘗字季卿號冷齋海鹽人紹興五年進士仕至

太府卿注杜詩行于世

樂郊私語杜少陵集自遊龍門至過洞庭詩目  
次第為此州先正魯季卿編定大都一循少陵  
生平行跡可以見其詩法升降隨其年自少而  
壯而老愈入于細而化也

春詞

疊穎叢條翠欲流  
午陰濃處聽鳴鳩  
兒童賭罷榆錢去

狼籍春風漫不收  
詩林萬選

沈作喆

作喆字明遠吳興人丞相該之姪紹興五年進  
士嘗為江右漕屬作哀扇工歌忤洪帥魏良臣



道弼据深文劾之奪三官有寓山集

哀扇工歌

黃州竹扇名字著織扇供官困追捕史君開府未浹旬  
欲戴綸巾揮白羽新模巧製旋剪裁百中無一中程度  
犀革鐫柄出蟲魚麝煤熏紙生煙霧戢山老姥羞翰墨  
漢宮佳人掩紈素衙內白取知何名帳下雄拏不知數  
供輸不辦箠楚頻一朝赴水將誰訴史君崇重了不聞  
嗚呼何以慰黎庶聞道園家賣菜翁又說江南打魚戶

號令亟下須所無官不與錢期限遽歸來痛哭辭妻兒  
宿昔投繯挂枯樹一雙婉婉良家子吏兵奪取名為顧  
弟兄號叫鄰里驚兩家吞聲喪其嫗死者已矣可柰何  
冤魂成羣空號呼去聲殺人縱欲勢位尊貪殘無道天所  
怒邦人蓄憤不敢言君其拊馬章臺路清波別志

鶚按韋居安梅磎詩話云袁扇工詩不傳今從  
清波別志檢得無名子袁扇工歌一首當即是  
沈詩佚其姓名爾陳直齋云袁扇工詩罵而非  
諷今讀之良然仍以還沈

鄭若谷

若谷鄞人紹興五年進士

和潘良貴題明州三江亭韻

遠望登高萬象侵  
元戎端不為花尋  
未誇駕鶴蓬山路  
應壯斬鯨遼海心  
小艇鱸肥盤膾玉  
危闌客醉椀揮金  
中流擊楫雄圖遠  
回笑三閭澤畔吟

延祐四明志

關注

注字子東景仁子  
澥弟紹興五年進士  
教授湖州至太常博士  
自號香巖居士有  
關博士集

記夢

玄衣仙子從雙鬟緩節長歌一解顏滿引銅杯效鯨吸  
低回紅袖作弓彎舞留月殿春風冷樂奏鈞天曉夢還  
行聽新聲太平樂先傳五拍到人間

墨莊漫錄宣和二年睦寇方臘起幫源浙西震  
忍關注子東在錢塘避地攜家於無錫之梁溪  
明年臘就擒子東貧未能歸僑寓毗陵郡崇安  
寺古柏院中一日忽夢臨水有軒主人延客年  
可五十儀觀甚偉玄衣而美須髯揖坐使兩女  
子以銅杯酌酒謂子東曰自來歌曲新聲先奏  
天曹然後散落人間他日東南休兵有樂府曰  
太平樂汝先聽其聲遂使兩女子舞主人抵掌為

節已而恍然而覺猶能記其五拍子東以詩紀之云云

### 松聲

夢破松聲枕上聞  
睡魔夜半戰吟魂  
初疑夜雨連江岸  
乍覺寒潮上海門  
招引好風來古寺  
追隨月色下前村  
晚行欲向聲來處  
鬱鬱蒼波盡日奔

南窗紀談

### 句

鐘聲互起東西岸  
漁火遙分遠近村

春渚紀聞此余友關子東西湖夜歸所作非身到西湖不知此語形容之妙

夜長何時旦苦寒不成寐

強行父唐子西先生文錄關子東一日寓辟離  
朔風大作因得句云云以問唐先生云詩律雖  
不到對亦似不穩先生云正要如此一似藥中  
要存性也

朱敦儒

敦儒字希真洛陽人以薦起紹興五年賜進士  
出身為祕書省正字兼兵部郎官遷兩浙東路  
提點刑獄上疏乞歸居嘉禾晚除鴻臚少卿有  
巖壑老人詩文一卷又有獵較集

二老堂詩話希真詩詞獨步一世秦丞相晚用  
其子某為刪定官欲令希真教秦伯陽作詩遂  
落致仕除鴻臚少卿蓋久廢之官也蜀人武橫  
作詩嘲之未幾秦丞相薨希真亦遭臺評高宗  
曰朕用明彙薦以隱逸命官置在館閣豈有始  
怙退而晚奔競耶其實希真老愛其子而畏避  
寵逐不敢不起識者憐之

### 小盡行

避地廣中作

藤州三月作小盡梧州三月作大盡哀哉官歷今不頒  
憶昔昇平淚成陣我今何異桃源人落葉為秋花作春  
但恨未能與世隔時聞喪亂空傷神

竹坡詩話

絕句

輕陰小雨晚難收  
柳瘦梅窮卻似秋  
可恨水仙花不語  
無人共我說春愁

春怨

梨花雨送海棠風  
不借胭脂作小紅  
幾日無人吹玉笛  
鴛鴦飛入館娃宮

以上後村詩話

絕句

青羅包髻白行纏  
不是凡人不是仙  
家在洛陽城裏住



臥吹銅笛過伊川

澄懷錄陸放翁云朱希真居嘉禾與朋儕詣之  
聞笛聲自煙波間起頃之權小舟而至則與俱  
歸室中懸琴筑阮咸之類簷間有珍禽皆目所  
未覩室中簾缶貯果實脯醢客至挑取以奉客  
其詩云云

句

過時不語鶯解事怕客深藏魚見機 人間萬事老無

味天下四時秋最愁 翦茅編鶴屋篩米聚雞糧 燈

昏鼠窺硯雨急犬穿籬

後村詩話

孫松壽

松壽字崑老，郫縣人。紹興五年，類試進士，嘗為

漢嘉守，除直祕閣。

觀古魚鳧城

在溫江縣北十五里有小院

野寺依脩竹，魚鳧迹半存。高城歸野壠，故國靄荒村。古  
意憑誰問，行人謾苦論。眼前興廢事，煙水又黃昏。

賦成都碧雞坊李氏石君

原注：事見成都古今記。中蓋湖石之最大而奇。

者著名舊矣

造化小兒斲山骨幾年流落蛟龍窟太湖一碧浸玻瓈  
瀾吞浪吐窮奔突瑰奇未許困泥沙漂出江臯空傲兀  
清寒偃蹇如高人肯向蓬蒿念埋沒曩聞上苑饒奇珍  
千形萬狀高嶙峋當年搜索困山海羶包席裏車轢轢  
規模豈但肖五岳氣象直欲凌三神一朝邊馬窺城下  
倒隨矢石荒荆榛憐君分落幽人手不逐爾輩汙塵垢  
首陽寂寞伯夷清瀟湘冷落三閭瘦李侯胸中飽雲夢  
得君不用斯瓊玖館之舊隱與周旋竹士松賓三益友

相看一洗名利心眉宇更清元德秀君今幾世德未衰  
霜寒玉立癯而壽咄嗟世眼多嗜好玩形忘理十八九  
奇章所蓄森琅玕名標甲乙空紛然到溉奇礪高岑律  
一擲徒為負進錢石君於汝非不厚較其所得無何有  
願公世濟此君為不朽

以上成都文類

王灼

灼字晦叔遂寧人嘗佐總幕有頤堂先生集

贈王道成

龍鍾健兒須如棘幼事秦府持鞭勒戰塵撲面心已灰  
徑上三峯弄泉石乾坤變化五百年人間未識地行仙  
布囊落魄荆州市丹經祕法為君傳散盡千金何所有  
腹中氣作蛟龍吼功成直欲投紫霄尚愛岷峨山下酒  
年來我亦厭樊籠乞取微言為指蹤君不見葉縣雙鳧  
緱嶺鶴古來度世多吾宗

夷堅志王道成先生者夔州人射利江湖間為  
賈客政和六年忽遇異人傳內丹之妙遂破家  
從王鼎學道遨遊東西二蜀鼎亦時見荆南市  
中不與人交一談無能識其誰何者身長七尺

廣目美髯狀貌如四十許人荆南父老自兒童時蓋已見之一日與道成飲自通姓名曰吾洛陽人唐武德初事秦王為御者奔走兵間後得仙法隱華岳山中以至於今酒酣別去不知所往道成本愚民不能從其詞訪大業武德中事且驗其是否紹興六年道成王灼晦叔於金川講巖盟之好為作古風一篇與之此篇見頤堂集中不終言道成之究竟也

銅馬歌


并序

郛城村民鑿古墓遂得一銅馬高三尺許制作精妙前簡池守景季淵取以歸中宵風雨輒聞嘶聲怪之不敢留移送佛寺紹興丙子予以事至成都黃伯淵

見索作銅馬歌

君不見武皇逸志凌九垓追風躡影思龍媒魯班門外  
立銅馬天廐萬匹皆塵埃又不見伏波將軍破交賊歸  
來殿前獻馬式據鞍習氣殊未衰想見老子真矍鑠兩  
京翻覆知幾秋只有山河供客愁孤煙落日蠶叢國出  
此神物于荒丘千年黃壤誰作主猶把歸心泣風雨但  
恐一朝去無蹤有似豐城寶劒化雙龍

以上 頤堂集



宋詩紀事卷四十四